

25. Avium catervæ decidebant super *Rákshasum* occisum; cœlestes florum imbres super ejus adversarii caput.

26. Fortissimus ille, cum *LAVANAM* occidisset, tunc demum fratris sui, magno robore præditi, qui *INDRAJITIS* cæde splendebat, fratrem germanum se putabat.

27. Caput illius, quem eremitæ, voto potiti, laudibus efferebant fulgebat robore erectum, pudore demissum.

28. Ille virtute ornatus, divitiarum cupiditate liber, pulchro corpore præditus, in *Yamunæ* ripa *Mathuram* urbem condidit.

29. Quæ splendebat civium prosperitate, justo imperio conspicienda, ac si cœli opibus acceptis condita esset.

30. Ibi ædium tectum ascendens, *Yamunam chakravákis* plenam adspiciens, veluti terræ comam, ornatu aureo decoratam, lætabatur.

31. At *DASARATHÆ* amicus et *JANAKÆ* consiliarius, utriusque amore motus, *SÍTÆ* filios rite consecravit.

32. His quia humor uterinus sacro gramine et crinibus e vaccæ cauda abstersus erat, ideo ex horum appellatione vates pueris *KUSÆ* et *LAVÆ* nomina indidit.

33. Vix ex infantia egressos, *Vedas* cum *Angis* legere edoctos, suum carmen recitare docuit, primam poetarum viam.

34. Filii, *RÁMÆ* res gestas dulce canentes coram matre, hujus separationis dolorem aliquantulum leniebant.

35. Reliqui etiam tres viri, e *RAGHUIS* stirpe orti, trium ignium sacrorum instar splendentes, ex uxoribus suis, quæ conjunctione cum illis revera maritis præditæ erant, binos filios acceperunt.

36. *SATRUGHNAS*, fratris majoris amantissimus, filiis suis celebratis *SATRUGHÁTINI* atque *SUBÁHUI*, *Vedarum* peritissimo, *Mathuram* atque *Vidisam* urbes tradidit.

37. “Ne iterum castigationes tuæ turbentur!” Ita *VÁLMÍKI* precatus, abiit ex illius eremo, ubi hinnulei immoti *SÍTÆ* filiorum cantum auscultabant.